

Directiva di ReD lo aproba lista oficial pa eleccion 2017 dia 30 di juli awo



Recientemente a tuma luga na ATIA Building un Algemeente Ledenvergadering (ALV) caminda miembronan di e partido ReD Democrático por a presencia “bij acalamatie” e momento cu directiva di e partido, cu aprobacion di consehero, a deposita nan confiansa den Ricardo Croes como lijst rekker di e partido pa e eleccion parlamentario 2017. Durante e mesun reunion anual aki, a presenta Nuris Lampe como candidato nobo di e partido.

Siguiendamente den un “Bijzondere ALV”, cu lo tuma luga dia 30 di juli proximo, lo aproba e lista completo, cu secuencia di e candidatonan riba e lista. Den un comunicado emiti pa e partido na ta bisa, “Aunke cu nos sa cu pa ReD for di su inicio no ta conta ki number bo tin riba lista, sino ta cantidad di voto di cada candidato ta determinante ken ta drenta Parlamento, den caso cu haya asiento(nan).”

A presenta tambe e programa di ReD 2017, cu ya ta disponibel online via nan pagina di Facebook. Segun e partido, e meta final ta pa logra bon gobernacion (goed bestuur, good governance) y e miho medio pa logra esaki na e momentonan aki ta via un zakenkabinet, idea cu a risibi apoyo di e miembronan y simpatizantenan di ReD.

Durante e reunion a informa e miembronan cu tur e esfuerço pa yega na un lista combina un bes mas no a duna fruto, y nan a gradici e

ciudadanonan, cu no ta afilia na ningun partido, y a fungi como persona di contacto neutral entre e diferente partidonan y nan unico interes tabata e interes general. Nan intencion tabata genuino a pesar cu no a logra pa combina lista, segun e comunicado.

“E energia den e sala yen tabata uno sumamente positivo y tur skina ta tende cu ReD ta e speranza pa e cambio. E presentacion di e candidatonan ta muestra cu ReD a pasa den “verjongingsproces”, ya cu e mayoria presente tabata representa e generacionnan mas jong.

Tin speranza pa ReD, tin speranza pa Aruba, esey tabata e ambiente di e reunion di dia-domingo cu a pasa. Nos kier gradici e presidente di directiva di ReD, ir. Robby Croes, pa tur su trabao cu a hiba na un reunion exitoso di ALV bao di su liderazgo”, e partido ta bisa.

Lansamento candidato nobo
E candidato nobo presenta pa e partido, Nuris Lampe, a studia medicina na Venezuela y Mexico y a specialisa den dermatologia.

E tabata pa hopi tempo presidente di e asociacion di specialistanan di Aruba y ta activo tambe riba tereno di pintura artistico. “Ta trata di un profesional excelente cu ta cla pa sirbi nos pueblo via politica cu ta e vocacion di mas noble cu tin. Dokter Nuris Lampe ta enrikece e famia di ReD. Bonbini y danki”, e comunicado di e partido ta termina bisando.

